



Al zûc di lâ a platâsi jê a varès zuiât ogni dì. Îr a si jere verementri ben platade. Al trê e jere bielzà insom de scjaibule dal fenîl.

Al cuatri e jere platade sot dal fen. Al sîs par platâsi miôr e jere lade tant in sot che al siet e jere colade te buse dal fen. Al vot, nuie di mâl, e jere colade suntune piore e come che il stali al jere sierât a clâf, a si jere fate cjatâ dome le sere...

9, fortune che no jere colade sui cuars di une cjavre.

10, o su le schene di une scrove... Joiii, cui vevie dite che lis scrovis a mangjin ancje i fruts? L'indoman a vevin tirât vie le scjaibule par che nissun al ledi plui a platâsi là sù. Ma no veve nancje tante voie di riscjâ di copâsi inmó une volte e al

1... Indulà vevie di lâ a platâsi?

2... Daûr dal arbul di là de cise?

3... No, li lis ocjis no lassavin jentrâ nissun, no jerial li che chê ocje i veve becât il cûl a sanc cuant che e jere piçule?

4... No podeve stâ tant a rifleti. E scugnive sei platade prime che chê che contave e rivas al dîs. Le rê e le cise! Li nol jere mai lâ a platâsi nissun. Par rimpinâsi sulle rê e rondolâsi su le cise e colâ jú di chê altre bande i jere bastât pôc.

5... Poiant il pît par tiere e veve sintût un grugnâ.

6... Une scrove lontan doi metros si alçave sù e e vignive viers di jê corint.

7... Tirant sù le cotule cu lis mans e veve cjapât le corse cence savê indulà che leve.

8... Ae çampe! Ae çampe un muret di claps!

9... Alore op sul muret. Al nûf e mieç le scrove e rivave sù di jê tant che jê e saltave jù di chê altre bande.

Al colâ dal dîs a coreve vie viers il quarton che e veve viodût da pe dal prât sierantlu svelte daûr di se. Uf! Juste a timp.

Ma tant che le scrove e tornave indaûr a calmâ i soi piçui, jê si meteve a saltâ come une indjaulade cirint di businâ sot vôs par no fâsi sintî da chê che a veve a pene finît di contâ.

Lis gjambis, i braçs e ancje le muse a tacavin a becâi dapardut parcè che lis jerbis altis di chel prât a jerin dutis urtiis. Le contentece di vêle fate francje a veve durât pôc. Come il dì prime.

di Jaio Furlanâr

#214